

Segun Tico Croes

Problema di Coastal ta duna Aruba un mal imagen internacional

ORANJESTAD(AAN) -- Miembro di AVP, Tico Croes, a duna di conoce na DIARIO cu e problema di Coastal a duna Aruba un mal imagen den exterior.

Segun Croes, AVP a sigui hopi di cerca e desaroyonan di e ultimo simannan encuanto e problema di Coastal.

E ta lamenta e actitud di Gobierno di Aruba pasobra Promer Ministro Oduber manera nan ta definie, e interes general ta solamente na interes di Coastal lubidando cu e interes di e trahadornan tambe ta forma parti di interes general.

Na Augustus '89 AVP a screen Coastal y tabata sa ki tipo di compania Aruba lo bay trata cune.

A informa Gobierno riba esaki pero lastimamente no a tene esaki na cuenta.

Segun Croes, por a nota cu Coastal kier a pasa riba nos leyman. Coastal no solamente a falta respet pa e derecho sagrado di trahador pa por afilia na un sindicato sino aparentemente a secuestra un Turco. El a muestra cu te ainda no tin claridad den e caso aki.

Croes a señala cu tambe un sindicalista Hulandes a worde ex-

pulsa. Tur esaki segun Croes, lo duna Aruba un mal imagen den exterior. Ta asina cu sindicato Hulandes y Belga a critica e asunto di expulsion.

Tur esaki ta causa cu nos reputacion pa ta un pais democratico cu respet pa derechonan sagrado di ser humano a ser mancha. E asunto aki a capta atencion internacional y lo ta punto di discusion den un convencion na Ginebra.

Segun Croes, casi sigur Aruba lo worde condena pa no a respeta e derechonan sagrado di un ser humano.

Gobierno segun Croes, basicamente a tuma un postura como anti trahador.

Esaki atrobe a worde ractifica ora por a tende Promer Ministro Croes bisa cu fin di siman cu a

pasa e tabata tin reunion cu batayon di jurista local pa muestra Mericanonan con nan por kita hende for trabao.

Tur esaki ta pone e bon reputacion di Aruba bay perdi. Sindicato internacional casi sigur lo condena Aruba y lo pone

den lista di paisnan manera Haiti y Africa cu no ta respeta derechonan humano.

Croes a señala cu trapamento riba derecho humano por causa

un temor pa turistanan cu ta e pilar di e economia di Aruba.